

## Evening Dogri (NSD)

24-11-2025

### खबरां

1. भारती सिनेमा दे वरिष्ठ अदाकार ते पदमभूषण कन्नै सम्मानित धर्मेन्द्र हुंदा अज्ज बडुलै मुम्बई स्थित अपने घरै च काल होई गोआ।
2. न्यासमूर्ति सूर्य कांत होरें अज्ज भारत दे 53में प्रधान न्याधीश दे रूपै च सगंध चुक्की।
3. प्रधानमंत्री नरेंद्र मोदी होर कल उत्तर प्रदेश दे अयोध्या च श्री राम जन्म भूमि मंदर जाइयै मंदरै दे शिखर पर रस्मी तौरा पर भगवा झंडा फहराडन।
4. केंद्री मंत्री किरण रिजिजू होर अज्ज भूटान दे प्रधानमंत्री शेरींग तोबगे हुंदे नै मिले।
5. नौसेना नै अज्ज मुम्बई स्थित नौसेना डाक्यार्ड च पनडुब्बी रोधी माहे श्रेणी दे पैहले युद्धपोत आई.एन.एस माहे गी शामिल करी लैता ऐ।
6. निर्वाचन आयोग नै आखेआ कि मतदान सूचिएं दी नमें सिरेआ नजरसानी आहली प्रक्रिया दे दुए गेड़ दी शुरूआत दे बाद 99 प्रतिशत कोला मते गणना फार्म बंडे जाई चुके दे ना।
7. गुवाहाटी दे बरसापारा क्रिकेट स्टेडियम च दक्खन अफ्रीका कन्नै दुए टैस्ट मैच दे त्रीए ध्याड़े भारती टीम 201 रन पर आल हाउट होई गेई।

<><><><><><>

### Dharmender

भारती सिनेमा दे वरिष्ठ अदाकार ते पदमभूषण कन्नै सम्मानित धर्मेन्द्र हुंदा अज्ज बडुलै मुम्बई स्थित अपने घरै च काल होई गोआ। ओहू 89 बरें दे हे ते पिछले किश समें थमां कसरी चलै करदे हे ते इस्सै म्हीने उनेंगी किश चिरै लेई ब्रीच कैंडी अस्पताल च दाखल बी करोआना पेआ हा। बॉलीवुड च ही-मैन दे नां कन्नै मशूहर धर्मेन्द्र कोई 6 दहाकें कोला बी मते समें तगर फिल्मी दुनिया च छाए दे रेह। 1960 च उनें अपने फिल्मी सफर दी शुरूआत कीती ते दिखदे गै दिखदे इक सुपर स्टार बनी गे। उनें 300 कोला बी मतियें फिल्मं च कम्म कीता जिंदे चा कई सदाबहार ते हर कुसै दे चेत्ते च बसी दियां ना। उंदी यादगार भूमिकाएं च सभनें शा मती यादगार शोले फिल्म वीरू दी भूमिका दे अलावा फूल और पत्थर “सीता और गीता” “चुपके-चुपके” “धर्मवीर” “प्रतिज्ञा” फिल्में च बी उंदा रोल लोक अज्ज बी चेता करदे ना। धर्मेन्द्र गी

अखीरी बार 2024 च आई दी फिल्म "तेरी बातों में ऐसा उलझा जिया" च दिक्खेआ गेआ जेदे च शाहिद कपूर ते कृति सेनन मुख भूमिका च हे। उंदी अखीरी फिल्म 21 होग जेदा पोस्टर उंदे पूरे होने कोला किश घंटे पैहले गै जारी कीता गेआ ऐ। 8 दिसंबर 1935 गी लुधियाना च पैदा होए दे धर्मेन्द्र दा पैहला नां केवल कृष्ण देओल हा। उनें 2004 कोला 2009 तगर राजस्थान दे बीकानेर दी नुमायंदगी करदे होई बीजेपी दी तरफा लोकसभा दे मिम्बर दे रूपै च बी कम्म कीता। उनेंगी कई पुरस्कारें कन्नै सम्मानित कीता गेआ जिंदे च 1997 दा फिल्मफेयर लाइफ टाइम अचीवमेंट अवार्ड, 1990 च बनी दी फिल्म घायल लेई सर्वश्रेष्ठ लोकप्रिय फिल्म दा राश्ट्री फिल्म पुरस्कार, 2007 च अंतरराश्ट्री फिल्म अकादमी दा लाइफटाइम अचीवमेंट पुरस्कार ते 2005 च जी सिने अवाडर्स बी शामिल ना। धर्मेन्द्र हुंदे परिवार उंदी घरै आहली ते फिल्म अभिनेत्री हेमा मालिनी, पैहली घरै आहली प्रकाश कौर, 2 पुत्तर सनी देओल ते बाबी देओल ते 4 धीयां अजीता, विजेता, ईशा ते अहाना शामिल ना। देश दे दुनिया दिएं कई बड्डिणं हस्तिणं धर्मेन्द्र हुंदे पूरे होने पर गैहरा दुख प्रगट कीता ऐ जिंदे च राश्ट्रपति द्रौपदी मुर्मू, उपराश्ट्रपति सी.पी राधाकृष्णन, प्रधानमंत्री नरेंद्र मोदी, कई फिल्मी हस्तियें, उद्योगपति, कलाकार ते होर कई लोक शामिल न जिनें उंदी मौती पर गैहरा दुख प्रगट करदे होई उन्दे परिवार आहलें कन्नै दुख ते हमदर्दी प्रगट कीती ऐ। उंदा खीरी संस्कार अज्ज संज्ञा मुम्बई दे पवन हंस शमशान घाट पर कीता गेआ। उन्दे परिवार दे अलावा अमिताभ बच्चन, सलीम शान, सलमान खान, संजय दत्ता, अक्षय कुमार, अनिल कपूर, सिद्धार्थ राय कपूर, शबाना आजमी, दीपिका पादूकेण, रणबीर सिंह ते आमिर खान बी उंदे नडोए च शामिल होए।

<><><><><><>

## CJI

न्यायमूर्ति सूर्यकांत होरें अज्ज भारत दे 53में प्रधान न्याधीश दे रूपै च सगंध चुक्की। राश्ट्रपति द्रौपदी मुर्मू होरें अज्ज बड्डुलै राश्ट्रपति भवन च उनेंगी प्रधान न्याधीश दे ओहदे दी सगंध चकाई। जस्टिस सूर्यकांत, जस्टिस बी आर गवई हुंदी थाहरै पर आए ना। शपथ ग्रहण समारोह च उपराश्ट्रपति सी.पी राधाकृष्णन, लोकसभा अध्यक्ष ओम बिरला, प्रधानमंत्री नरेंद्र मोदी, केंद्री मंत्री अमित शाह, राजनाथ सिंह, जे.पी नड्डा ते होर कई हस्तियां मजूद हियां। 1962 च हरियाणा दे हिसार च जन्मे दे न्यामूर्ति सूर्यकांत होरें 1984 च हिसार जिला कोर्ट च वकालत शुरू कीती। ओहू संवैधानिक, सेवा ते दीवानी मामले दे माहिर ना। उनें कई युनिवर्सिटिणं, बोर्डें, निगमें बैंकें ते हाई कोर्ट दा नेतृत्व बी कीते दा ऐ। उनेंगी सन्

2000 च हरियाणा दा सभनें शा घट्ट उम्मी दा चीफ जस्टिस नियुक्त होने दा गौरव बी हासल ऐ।



## Ayodhya

प्रधानमंत्री नरेंद्र मोदी होर कल उत्तर प्रदेश दे अयोध्या च श्री राम जन्म भूमि मंदर जाइयै मंदरै दे शिखर पर रस्मी तौरा पर भगवा झंडा फहरांगन। एहू रस्म मंदिर दा निर्माण कम्म पूरा होने ते सांस्कृतिक उत्सव ते राश्ट्री एकता दे इक नमें ध्याय दे शुरू होने दी प्रतीक ऐ। इस मौके पर प्रधानमंत्री होर उत्थे मजूद किट्टै गी बी संबोधित करंगन। एहू कार्यक्रम मंगर म्हीने दे शुक्ल पक्ख दी शुभ पंजमी तित्थ, जेड़ा जे भगवान श्री राम ते माता सीता हुंदे ब्याह आहला अभिजीत महरत ऐ कन्नै होग। एहूदे अलावा एहू तित्थ सिखें दे नौमे गुरू श्री गुरू तेग बहादुर हुंदा शहीदी दिवस बी ऐ। उनें 17मीं शताब्दी च अयोध्या च 48 घंटे तगर निरंतर ध्यान कीता हा। कल जेहड़ा भगवा झंडा राम मंदर दे शिखर पर फहराया जाहग, ओहू 10 फुट उच्चा ते 20 फुट लम्मा ध्वज ऐ, जेहूदे पर भगवान श्री राम हुंदे पराक्रम, यश ते तेज दे प्रतीक इक दीप्तिमान सूर्य दी छवि बनी दी ऐ ते एहूदे पर कोविदारा बूहटे कन्नै ओम बी लिखेआ गेदा ऐ।



## Rijju-Bhutan

केंद्री मंत्री किरेण रिजिजू होरें अज्ज भूटान दे प्रधानमंत्री शेरिंग तोबगे हुंदे नै मिले। इक सोशल मीडिया पोस्ट पर उनें लिखेआ जे मलाटी दरान भारत ते भूटान दी दोस्ती ते सांझ भ्याली दे बारै च तफसीली गल्लबात दे कन्नोकन्नी दौनें मुल्लें दी सांझी विरासत, सांस्कृतिक परम्पराएं ते समाजी परिवेश दे बक्ख-बक्ख पहलुएं पर सोच-विचार कीता गेआ। रिजिजू होरें अगगे आखेआ जे महात्मा बुद्ध हुंदा संदेश ते उंदे पवित्र अवशेष दौनें मुल्लें बश्कार सदभाव ते आस्था दे रिश्ते गी सदिएं थमां मजबूती दिंदे आवा करदे ना। एहूदे शा पैहले किरेन रिजिजू हुंदा अज्ज उत्थे पुज्जने पर निग्गा सुआगत कीता। ओहू अपने कन्नै भगवान बुद्ध हुंदे अवशेषें दी वापसी दे सिलसिले च इक प्रतिनिधिमंडल दा नेतृत्व करा करदे ना। भारत थमां आंदे गेदे इनें पवित्र अवशेषें गी भूटान आसेआ आयोजित वैश्विक शांति प्रार्थना महोत्सव दरान दर्शाने लेई विशेष हाल च रखेआ गेदा हा।



## Goyal-Auntariyo Mini

केंद्री वाणिज्य ते उद्योग मंत्री पीयूष गोयल नै अज्ज कनाडा दी अपनी यात्रा दरान ऑंटारियो दे आर्थिक विकास, रोजगार, सृजन ते बपार मंत्री विक्टर फेडेली हुंदे कन्नै मलाटी कीती। सोशल मीडिया पोस्ट च गोयल होरें आखेआ जे उंदी गल्लबात भारत-कनाडा बपार ते निवेश दे मौके बढ़ाने ते बक्ख-बक्ख खेत्तरें च सहयोग गी होर गहरा करने बारै होई।



## Pak Gun Attack

पाकिस्तान च पेशावर दे इक अर्धसैनिक बल मुख्यालय पर अज्ज होए दे आत्मघाटी हमले च 3 सुरक्षाकर्मी मारे गए ते 2 घायल होई गए। शहम दे पुलिस प्रमुख मियां सईद नै दस्सेआ ऐ जे फेडरल कांस्टेबुलरी मुख्यालय च हमला करने दी कोशिश करा'रदे 3 आत्मघाती हमलावर बी जवाबी गोलीबारी च मारे गए न। खैबर पख्तूनख्वा दे पुलिस महानिरीक्षक जुल्फिकार हमीद नै दस्सेआ जे एफ.सी मुख्यालय दे अंदर 2 आत्मघाती विस्फोट होए। इक्क मुख्य दरवाजे पर ते दुआ परिसर च मोटरसाइकल स्टैंड दे कोला अस्पताल अधिकारिएं मताबक हमले च 3 नागरिकें सने 4 लोक घायल होए न।



## Navy-Mahe

नौसेना नै अज्ज मुम्बई स्थित नौसेना डाक्यार्ड च पनडुब्बी रोधी माहे श्रेणी दे पैहले युद्धपोत आई.एन.एस माहे गी शामिल करी लैता ऐ। इस मौके पर थल सेना प्रमुख उपेंद्र द्विवेदी, मुख् परौहने दे रूपै च शामिल होए। एहू घट्ट डूंगे पानी च बरतेया जाई सकने आह्ला नमी पीढी दा ते मुख् अंदर तैयार कीता गेदा लड़ाई बेडा ऐ ते एहदा निर्माण कोचिन शिपयार्ड लिमिटेड आसेआ कीता गेआ ऐ। एहू आत्मनिर्भर भारत आहली पैहल दे तैहत पोत निर्माण तंत्र च भारत दी बधदी छमता दा प्रतीक ऐ। एहू युद्धपोत खतरें दा पेशगी पता लाई लैने ते उनेंगी नष्ट करने लेई पच्छमी समुंद्री कंडे पर इक सौहगे सतर्क निगेबान ते चुपचाप रेहियै खतरे रूपी शकार पर तक्क रखने दा कम्म करग।



## SIR

निर्वाचन आयोग नै आखेआ ऐ कि मतदाता सूचिएं दी नमे सिरेआ नजरसानी आहली प्रक्रिया एस.आई.आर दे दुए गेड़ दी शुरूआत दे बाद 99 प्रतिशत कोला मते गणना फार्म मतदाताएं च बंडे जाई चुके दे न। आयोग नै दस्सेआ ऐ कि अजे तोड़ी 50 करोड़ 50 लख कोला मते Enumeration फार्म बंडी दित्ते गेदे न। एस.आई.आर दा दुआ गेड़ इस म्हीने दी 4 तरीक थमां 9 राज्यें ते 3 केंद्र शासित प्रदेशें च शुरू होई चुके दा ऐ। इनें राज्यें च छत्तीसगढ़, गोवा, गुजरात, केरल, मध्य प्रदेश, राजस्थान, तमिलनाडू, उत्तर प्रदेश, पच्छिम बंगाल, पुदुचेरी, लक्ष्यदीप ते अंडमान निकोबार शामिल न। मतदाता सूचिएं दी बड्डे पैमाने पर नमे सिरेआ नजरसानी दी प्रक्रिया अगले बरे 7 फरवरी गी अखीरी मतदाता सूचि छपने दे कन्नै गै मुक्की जाह्ग।

<><><><><><>

## Pakistan-Baloch

मानवाधिकार संकट दे बश्कार पाकिस्तान च बलूचिसतान च होई दी छापेमारी च पाकिस्तानी बलें 15 बलूच नागरिकें गी हिरासत च लैता ऐ। मानवाधिकार संगठन बलूच वाइस फार जस्टिस नै दस्सेआ जे शुक्रवारें डेडा बुगती जिले च कई छापेमारिएं च पाकिस्तानी सुरक्षा बलें ते आतंक रोधी विभाग नै लोकें गी हिरासत च लैता ऐ। लगातार बड्डी गिनतरी च लोकें गी बगैर जानकारी दे गिरफ्तार कीता जारदा ऐ।

<><><><><><>

## Cricket

ते हुन क्रिकेट। गोवाहाटी दे बरसापारा क्रिकेट स्टेडियम च दक्खन अफ्रीका कन्नै दुए टैस्ट मैच दे त्रीए ध्याडे भारती टीम 201 रन पर आल हाउट होई गई। मेहमान टीम नै उन्दे पर 288 रन दी बढत बनाई दी ऐ। पैहली पारी च दक्खन अफ्रीका नै 489 रन बनाए हे जेदे परते च भारती टीम 201 रन गै बनाई सकी। अज्जै दा खेड्ड मुक्कने तगर दक्खन अफ्रीका नै अपनी दुई पारी च 26 रज बनाई लैते दे हे।

<><><><><><>

## Film-Festival

साहित स्टूडियो तरफा तैयार कोंकणी लौहकी फिल्म 'घर' अज्ज फिल्मोत्सव दे गोवा खेड्डें च प्रदर्शित कीती गई। घर इस विचार गी दर्शादी ऐ जे कोई घर चार दीवारें थमां मता जीवन, भावनाएं ते मनुक्खता दे सरबंधै कन्नै भरोचे दी थाहर ऐ। एहू फिल्म सडक हादसे च कुसा सदस्य दी मौत दे बाच परिवार गी जिंदगी च आए दे बदलाव गी दस्सदी ऐ। फिल्म च रवि किशोर ते रोहित खांडेकर मुख्ख भूमिकाएं च ना। एहदा निद्रेश किशोर अर्जुन करा'रदे ना। बाल कलाकार शार्दुल बोरकर ते विकास कासलीवाल नै बी बेहतरीन अभिनय कीता ऐ। पूरी चाल्ली गोवा च फिल्माई गेदी एहू फिल्म फिल्मोत्सव दे पिछले संस्करण च साहित स्टूडियो तरफा प्रदर्शित कीती गेदिएं 5 फिल्में दा अनुसरण करदी ऐ।



## JK-Limestones

केंद्र शासित प्रदेश जम्मू-कश्मीर च चूना-पत्थर आहले खनिज ब्लॉकें दी पैहली-पैहली निलामी अज्ज जम्मू च शुरू होई। केंद्री कोयला मंत्री जी. किशन रेड्डी होरें इस कार्यक्रम दी अगुवाई कीती ते मुख्खमंत्री उमर अब्दुल्ला ते उपमुख्खमंत्री सुरिंद्र चौधरी होर बी इस कार्यक्रमै च शामिल होए। 2015 आहले खान्नै सरबंधी सुधारें दे बाद प्रदेश च पैहली बारी खान्नै सरबंधी ब्लॉक दी निलामी आहली प्रक्रिया तोढ चाढी जा'रदी ऐ। इ'नें ब्लॉकें च अनंतनाग, राजौरी ते पुंछ जिलें च 314 हैक्टर रकबे च फैले दे 7 चूना-पत्थर ब्लॉक शामिल ना। इ'नें ब्लॉकें च उच्च गुणवत्ता आहले चूना-पत्थरें लेई बड़ी मती समर्थ मजूद ऐ जिंदा इस्तेमाल सीमेंट तैयार करने, निर्माण कम्में ते होरनें औद्योगिक कम्में लेई कीता जंदा ऐ।



## Drang Reopening

गुलमर्ग च द्रंग सैलानी थाहर जिसी इस ब'रे अप्रैल च पहलगाम हमले दे परैन्त सुरक्षा कारणें करी बंद करी दिता गेदा हा अज्जै थमां सैलानियें लेई परतियै -खोल्ली दिती गई ऐ। गुलमर्ग दे विधायक फारुक अहमद शाह होरें इस बारे "एक्स" पर जानकारी दिंदे होई उपराज्यपाल मनोज सिन्हा, मुख्खमंत्री उमर अब्दुल्ला ते मुकामी अधिकारियें दा धन्नवाद कीता ते आखेया जे द्रंग सैलानी थाहर गी खोलने आहला फैसला सैलसफा गी बढावा देग।

